

四庫全書

子部

欽定四庫全書

冊府元龜卷一百八十九 宋 王欽若等 撰

閏位部

孝德 奉先 尊親

孝德

夫孝德之本也故王者之德莫大於孝上所以寧宗廟
下所以教人民導揚徽聲感勵風俗莫加於此焉若乃
凌晨問安時刻靡失逾月侍疾衣帶不解躬易脂澤至

於感慟親臨祭享罔不流涕所以雲物變采井泉湧發
蓋天性之所感故明靈之攸答傳示後葉美莫大焉

宋高祖少時家貧有大志不治廉隅事繼母以孝謹稱
及即大位春秋已高每旦入朝太后未嘗失時刻

梁高祖生知淳孝年六歲獻皇太后終水漿不入口三
日哭泣哀苦有過成人內外親黨咸皆敬異及丁文皇
帝憂時為齊隨王諮議隨府在荆鎮髻髻奉問便投劾星
馳不復寢食倍道就路憤風驚浪不暫停止高祖形容

本壯及還至京都銷毀骨立親表士友不復識焉望宅
奉諱氣絕久之每哭輒嘔血數升服內不復嘗米唯資
大麥日止二溢拜掃山陵涕淚所洒松草變色及居帝
位即於鍾山造大愛敬寺青溪邊造智度寺又於臺內
立至敬等殿又立七廟堂月中再過設淨饌每至展拜
嘗涕泗滂沱哀動左右

大同十年三月謁建陵有紫雲陰陵上食頃乃散帝
望陵流涕所需草皆變色陵傍有枯泉至是而流水香

潔辛丑哭于脩陵

簡文帝居穆貴嬪憂哀毀骨立晝夜號哭不絕聲所坐之席霑濕盡爛

後梁宣帝性不飲酒安於儉素事其母以孝聞

明帝孝悌慈仁有人君之量四時祭享未嘗不悲慕流涕

北齊孝昭帝性至孝太后不豫出居南宮帝行不正履容色貶悴衣不解帶殆將四旬殿去南宮五百餘步鷄

鳴而去辰時方還來去徒行不乘輦太后所苦小增便
即寢伏閣外食飲藥物皆躬親太后嘗心痛不自堪忍
帝立侍帷前以爪搯手心血流出袖友愛諸弟無君臣
之隔

梁太祖性孝慮奉太后未嘗小失色朝夕視膳為士君
子之規範帝嚴察用法無纖毫假貸太后言之嘗頗為
省刑

奉先

夫有國家者曷嘗不宗祀以本仁作廟以觀德尊祖以
致孝奉先以盡禮自秦遷周鼎頗遵古制逮於吳蜀建
號江左禪代莫不追加號謚充奉園邑增建廟貌聿修
時祭親執卣鬯躬謁松楸載籍所記可得而詳也東魏
北齊以及朱梁雖國祚運促日不暇給而崇薦尊稱肅
祇嘗事亦未曾闕焉

秦始皇二十六年初并天下采上古帝位號號曰皇帝
追尊莊襄王為太上皇

二十七年為太極廟

二世元年下詔增始皇寢廟犧牲令羣臣議尊始皇廟羣臣皆頓首言曰古者天子七廟諸侯五大夫三雖萬世世不軼毀今始皇為極廟四海之內皆獻貢職增犧牲禮咸備無以加先王廟或在西雍或在咸陽天子儀當獨奉酌祠始皇廟自襄公已下軼毀所置凡七廟羣臣以禮進祠以尊始皇廟為帝者祖廟

蜀先主章武元年四月即皇帝位于成都立宗廟祫祭

高皇帝以下

裴松之云先王雖云出自孝景而世數悠遠昭穆難明既紹漢祚不知以何帝為元

祖以立親廟于時英賢作輔儒生在官宗廟制度必有憲章而載紀闕畧良可恨哉

後主以章武三年五月襲位于成都是月先主梓宮自永安宮還成都謚曰昭烈皇帝追尊母甘皇后曰昭烈皇后

吳大帝權黃龍元年四月即皇帝位追尊父破虜將軍烏程侯堅為武烈皇帝廟曰始祖墓曰高陵母吳氏為

武烈皇后

張紘以破虜有破走董卓扶持漢室之勲討逆平定江東建立大業宜有記頌以昭公美

既成吳大帝省讀悲感曰
君貪識孤家門闕闕也

廢帝亮建興元年四月即位上大帝尊謚曰大皇帝墓
曰蔣陵五鳳二年十二月作太廟太平元年正月為太
帝立廟稱太祖廟

景帝即位遣使追尊母王夫人曰敬懷皇后改葬敬陵
後主皓元興元年八月即位謚休曰景皇帝葬定陵九
月追謚父和曰文皇帝

初尊和為昭獻皇帝
俄又改為文皇帝

改葬明陵

置園邑二百家令承奉守

寶鼎元年十月分吳郡丹陽九縣為吳興郡治烏程置
太守四時奉祠文皇帝廟

二年有司奏言文皇帝宜立廟京邑是年七月使守大
匠薛珣營立寢堂號曰清廟十二月遣守丞相孟仁太
常姚信等備官寮中軍步騎二千人以靈輿法駕東迎

神於明陵皓引見仁親拜送于庭

一云比孟仁還皓手
詔日夜相繼奉問神

靈起居動止巫覡言見和被服顏色如平生
皓悲喜淚涕悉召公卿尚書詣闕門下受賜靈輿當至

使丞相陸凱奉三牲祭於近郊皓於金城外露宿明日

望於東門之外其朔日拜廟薦祭獻歆悲感又追尊和
母王夫人曰大懿皇后

宋高祖初為宋王立廟于彭城祭高祖以下四世

永初元年六月即位追尊皇考為孝穆皇帝皇妣為穆皇
后七月戊申遷神主于太廟車駕親奉

少帝以永初三年五月即位上武帝謚曰武皇帝廟號
高祖葬初寧陵

九月有司奏武皇帝配南郊武敬皇后配北郊

文帝元嘉元年八月丁酉謁初寧陵還即位戊午拜太廟甲辰追尊所生胡婕妤為皇太后謚曰章皇太后陵曰熙寧立廟於京師

四年二月乙卯行幸丹徒謁京陵

二十六年二月乙亥車駕陸道幸丹徒謁京陵

二十八年三月拜初寧陵

孝武帝以元嘉三十年四月即位于新亭崇改太祖文皇帝號謚初元凶劾弒逆上謚曰景皇帝廟號中宗至

是改焉

五月甲午謁初寧陵

大明二年正月壬戌拜初寧陵

六年正月辛卯宗祀文皇帝于明堂以配上帝

八年正月辛巳宗祀文皇帝于明堂

前廢帝以大明八年閏五月即位上孝武皇帝尊謚廟

號世祖

九月祔葬文穆皇太后于景寧陵

明帝泰始元年十二月即位乙亥追尊所生沈婕妤曰
宣皇太后陵號崇憲壬午車駕謁太廟

後廢帝以泰豫元年四月即位上明皇帝尊謚廟號太
宗

順帝昇明元年七月壬辰即位癸卯車駕謁太廟

南齊太祖高皇帝建元元年四月即位追尊皇考曰宣
帝皇妣為孝皇后陵曰永安

六月庚辰法駕奉七廟主于太廟

十月己卯車駕殷祠太廟

武帝以建元四年三月即位上高皇帝尊謚廟號太祖
五月庚申以高皇帝配南郊高昭皇后配北郊

永明五年四月庚午車駕殷祠太廟

九月詔太廟四時祭宣皇帝薦麥餅鴨臠孝皇后薦羹
鴨卵脯醬炙白肉高皇帝薦肉膾菹羹昭皇后薦茗糗
炙魚竝平生所嗜也

十年十月車駕殷祠太廟

鬱林王以永明十一年七月即位上武皇帝尊謚廟號
世祖

九月辛酉追尊父文惠太子為世宗文皇帝

隆昌元年正月戊午車駕拜崇安陵

明帝建武元年十月即位十一月追謚父始安貞王道
生為景皇妃江氏為懿皇后別立寢廟陵號脩安四年
八月追尊景皇所生王氏為恭太后

東昏侯以永泰元年七月即位上高宗尊謚曰明皇帝

梁高祖武帝初封梁公立四親廟

天監元年四月即位追尊皇考為文皇帝廟號太祖皇
妣為獻皇后陵號建陵

十一月己未立小廟

十二年六月癸巳新作太廟增基九尺

十五年六月丙申改作小廟畢

大同十年三月甲午輿駕幸蘭陵謁建陵至脩陵壬寅
詔曰朕自違桑梓五十餘載乃眷東顧靡日不思今四

方欸闕海外有截獄訟稍簡國務小閒始獲展敬園陵

但增感慟

帝嘗夢具朝服入太廟拜伏悲感且於延務殿說所夢何敬容對曰臣聞孝悌之至通於

神明陛下性與天通故感應斯稟上極然之便有拜陵之議

簡文帝以太清三年五月辛巳即位癸未追尊所生穆

貴嬪為皇太后

十一月上武皇帝尊謚廟號高祖陵號脩陵

元帝以承聖元年十一月即位於江陵追尊所生妣阮

脩容為文宣太后

後梁宣帝嘗大定元年追尊其父統為昭明皇帝廟號
高宗統妃蔡氏為昭德皇后

明帝歸以大定八年二月嗣位上宣皇帝尊謚廟號中
宗改元天保

元年五月太皇太后龔氏薨謚曰元太后

九月所生母曹太妃薨謚曰孝皇太妃

二年皇太后王氏薨謚曰宣靜皇后

陳高祖武帝永定元年十月即位追尊皇考曰景皇帝

廟號太祖陵曰瑞陵皇妣董太夫人曰安皇后依梁初
園陵故事遷景皇帝神主祔於太廟

二年四月甲子親祀太廟

文帝以永定三年六月即位上武皇帝尊謚廟號高祖
天嘉元年六月辛巳改謚皇祖妣景安皇后曰景文皇

后甲午追策故始興昭烈王妃曰孝妃

始興王文
帝父也

二年十二月甲申立始興國廟於京師用王者之禮

帝自

入祠而皇考始興昭烈王廟在始興謂之東廟至是
徙東廟神主祔于梁之小廟故曰國廟祭用天子儀

廢帝以天康元年四月即位六月上文皇帝尊謚廟號
顯祖

十月庚申親祠太廟

光大元年十月甲申親祠太廟

二年七月丙午親祠太廟

九月戊午親祠太廟

宣帝大建元年正月甲午即位乙未謁太廟戊午親祠

太廟

十月壬午親祠太廟

二年春正月丙午親祠太廟

閏四月戊申謁太廟

十月乙酉親祠太廟

三年十月甲申親祠太廟

四年正月庚午親祠太廟

十月乙酉親祠太廟

五年正月甲午親祠太廟

六年正月壬午親祠太廟

四月甲午親祠太廟

八年四月乙未親祠太廟

東魏孝靜帝以天平元年十月丙寅即位壬申享太廟
四年四月辛未遷七帝神主入新廟

北齊文襄帝初為魏相置王高祖秦州使君王曾祖太
尉武貞公王祖太師文穆公王考相國獻武王凡四廟
文宣帝天保元年五月即位己未追尊皇祖文穆王為

文穆皇帝皇祖妣為文穆皇后皇考獻武王為獻武皇帝亡兄文襄王為文襄皇帝甲戌遷神主於太廟

三年正月乙丑有事于太廟

十月丁卯文襄皇帝神主入於太廟

文宣帝受禪置六廟曰皇祖司空公

廟皇祖吏部尚書廟皇祖秦州使君廟皇祖文穆皇帝廟太祖獻武皇帝廟世宗文襄皇帝廟為太廟獻武已下不毀已上則遠毀竝同廟而別室既而遷神主于太廟文襄文宣竝太祖之子文宣初疑其昭穆之次欲別立廟眾議不同至二年冬始祔太廟春祠夏禴秋嘗冬蒸皆以孟月并臘凡五祭禘祫始梁之制每祭室一太牢始以皇后配祭至河清定令四時祭廟禘祭及元日廟建竝設庭燎三所

廢帝乾明元年二月上文宣皇帝尊謚廟號高祖

孝昭帝皇建二年正月壬子禘于太廟

武成帝太寧元年十一月即位上孝昭皇帝尊謚

河清元年正月壬午享太廟

五月祔葬武明皇后于義平陵

二年正月以武明皇后配祭北郊

後主天統元年十一月己丑太上皇詔改太祖獻武皇帝為神武皇帝廟號高祖獻明皇后為武明皇后其文

宣謚號委有司議定

十二月庚午有司奏改高祖文宣皇帝為威宗景烈皇帝

二年正月癸巳禘祭於太廟

四年十二月上太上皇尊謚曰成皇帝廟號世祖

武平元年十月改威宗景烈皇帝謚號顯祖文宣皇帝
梁太祖初為梁王以唐乾寧二年二月領親軍屯於單
父會寒食帝乃親拜文穆皇帝陵於碭山縣午溝里

開平元年四月即位追尊四代廟號高祖妣州府君上
謚曰宣元皇帝廟號肅祖太廟第一室陵號興極祖妣
高平縣君范氏追謚宣僖皇后皇曾祖宣惠王上謚曰
光獻皇帝廟號敬祖第二室陵號永安祖妣秦國夫人
楊氏追謚光孝皇后皇祖武元王上謚曰昭武皇帝廟
號憲祖第三室陵號光天祖妣吳國夫人劉氏追謚昭
懿皇后皇考文明王上謚曰文穆皇帝廟號烈祖第四
室陵號咸寧皇妣晉國太夫人王氏追謚文惠皇后

五月甲午詔天下管屬及州縣官名犯廟諱者各宜改

換城門卽改為門局卽

避烈考諱

茂州改為汶州

避曾祖諱

桂州

慕化縣改為歸化縣潘州茂名縣改為越裳縣

癸卯司天監奏曰辰內有戊字請改為武從之

七月己亥帝御崇元殿內出追尊四廟上謚號玉冊寶

共八副宰臣文武百官儀仗鼓吹導引至太廟行事

三年正月己巳奉遷太廟四室神主赴西京太常儀仗

鼓吹導引齊車文武百官奉祠於開明門外甲戌帝發

東都已卯至西都庚寅親享太廟

二月丙午宗正寺請修興極永安光天咸寧陵竝合添
修上下宮殿栽植松栢制可癸亥勅豐沛之基寢園所
在悽愴動闕於情理充奉自繫於國章宜設陵臺兼升
縣望其輝州礪山縣宜升為赤縣仍以本縣令兼四陵
臺令

七月丙寅命宰臣楊涉赴西都以孟秋享太廟

乾化元年十月有司以立冬太廟薦享上言詔丞相杜

曉赴西都攝祭行事

二年正月丙戌有司以孟春太廟薦享上言命丞相杜
曉攝祭行事

末帝即位追尊母賢妃張氏為元貞皇太后祔葬宣陵
貞明三年十二月幸雒陽遂幸伊闕拜宣陵

尊親

夫王者之政不可得而變革者尊尊也親親也所以宣
孝熙之德崇教化之本况夫膺餘閔之數富霸王之資

當創物之初暨繼明之始莫不采有司之奏稽歷代之
典緣禮經之大義傳春秋之深旨尊以懿號崇以宮名
昭備物之章極奉親之意誠有國者之要道也雖云角
立其可關諸

蜀後主章武三年五月襲位于成都尊先主皇后曰皇
太后

吳孫皓元興元年八月即位九月尊母何姬為昭獻皇
后稱升平宮月餘進為皇太后

宋高祖永初元年即位六月尊王太后蕭氏為皇太后
有司奏曰臣聞道積者慶流德洽者禮備故祇敬表于
崇高嘉號彰於盛典伏惟太后母儀之德於穆不已保
翼之訓光被洪業雖幽明同慶稱謂未窮稽之前代禮
有常準宜式遵舊章允副羣望臣等請上宋王太后號
曰皇太后

少帝永初三年五月即位尊皇太后曰太皇太后

景平元年七月尊所生母張夫人為皇太后有司奏曰

臣聞嚴親敬始所因者本克孝之道繇中被外伏惟夫人德並坤元徽音光紹發祥兆慶誕啓聖明宜崇極徽號永備盛則從春秋母以子貴之義遵漢晉推愛之典謹上尊號為皇太后宮曰永樂

孝武帝元嘉三十年四月即位尊所生路淑媛為皇太后有司奏曰歷集周邦徽音克嗣氣淳漢國沙麓發祥昔在上代業隆祚遠未有不敷陰教以闡洪基膺淑慶以載聖哲者也伏惟淑媛柔明內服徽儀外範含靈初

迪則庶熙仰耀弘訓蕃聞則家邦被德民應惟和神屬
推祉故能誕鍾睿躬用集大命固靈根於既殞融勲烈
乎中興載厚化深聲永詠緝宜式諧舊典恭享極號謹
奉尊號曰皇太后宮曰崇憲

前廢帝大明八年閏五月即位崇皇太后曰太皇太后
皇后曰皇太后宮曰永訓

明帝泰始元年十二月即位太皇太后復號崇獻皇太
后後廢帝泰豫元年四月即位七月尊皇后曰皇太后

宮曰弘訓崇拜所生陳貴妃為皇太妃有司奏曰臣聞
河龍啟聖理映明神郊雷基皇慶爍大地故資敬之道
粹古銘風沿貴之誼眇代凝則伏惟貴妃含和月晷表
淑星樞徽音峻古柔光照世聲華帝掖軌秀天嬪景發
皇明祚昌睿命而備物之章未煥彝策遠酌前王允陟
鴻典臣等參議謹上尊號曰皇太妃輿服一如晉孝武
李太妃故事宮曰弘化

順帝即位昇明元年崇拜帝所生陳昭華為皇太后

南齊鬱林王即位尊母文惠太子妃為皇太后稱宣德宮
梁敬帝紹泰元年十月即位尊所生夏貴妃為皇太后
後梁宣帝譽為周太祖所立居江陵東城稱皇帝於其
國尊其所生母龔氏為皇太后

明帝歸嗣位之元年尊其祖母龔太后曰太皇太后嫡
母王皇后曰皇太后所生母曹貴嬪曰皇太妃

陳文帝永定三年六月即位七月尊皇后章氏為皇太
后宮曰慈訓

廢帝天康元年四月即位五月尊皇太后曰太皇太后
皇后沈氏曰皇太后宮曰安德

後主大建十四年即位尊皇后柳氏為皇太后宮曰弘
範

北齊文宣帝天保元年五月即位尊皇太后婁氏為太
皇后宮曰宣訓

廢帝天保十年十月即位尊皇太后為太皇太后皇后
李氏為皇太后

孝昭帝皇建元年八月即位詔奉太皇太后還稱皇太
后皇太后稱文宣皇后

後主天統四年十二月太上皇帝殂上太上皇后尊號
為皇太后



冊府元龜卷一百八十九

欽定四庫全書

子部

冊府元龜卷一百

九十五
九十三

詳校官中書臣涂日煥

員外郎臣牛稔文覆勘

總校官庶吉士臣何思鈞

校對官學正臣李巖

謄錄監生臣于希賢

欽定四庫全書

冊府元龜卷一百九十 宋 王欽若等 撰

閏位部

姿表 智識 聰察 器度 才藝

姿表

洪範五事一曰貌貌曰恭是以八彩重瞳表唐堯虞舜之異龍頰日角彰漢高光武之奇大勳既協於天人純粹必形於體貌自繼統之外代有其君至若姿表端莊

神明奕邁方頤大口龍顏鐘聲或貴兆已形致異人之
默識或天光峻發使外國以仰觀亦有瞻顧非常眉目
如畫挺神仙之骨格儼鸞鳳之儀容若加之以才智辯
明器度雄遠皆可亞真人之奇表紹有國之基局也

秦始皇蜂準

蜂一作隆長目鵞膺豺聲

蜀先主身長七尺五寸垂手下膝顧視見其耳

吳武烈帝孫堅容貌奇絕

大帝方頤大口紫髯長上短下漢末劉琬能相人見大

帝兄弟曰孫氏兄弟雖各才智明達然祿祚不終唯中弟孝廉形貌竒偉骨體不常有大貴之表年又最壽爾試識之

宋高祖身長七尺六寸風骨竒特晉世桓玄篡位從兄撫軍將軍循在京口以高祖為中兵叅軍從循入朝至建業玄宿憚高祖威名又悅高祖之風儀姿貌謂司徒

王謚曰昨見劉裕卿乃不得獨擅其清

或說玄白劉裕龍行虎步瞻顧

不凡恐不為人下宜早為其所玄曰我方欲平蕩中原非裕莫可付大事待關隴平定然後當別議之耳桓玄

謂王謚曰昨見劉裕風骨不常蓋人傑也

文帝年十四身長七尺五寸

孝武帝少機穎神明爽發

前廢帝蜂目鳥喙長頸銳下

順帝姿貌端華眉目如畫見者以為神人

南齊高帝姿表英異龍顏鐘聲長七尺五寸鱗文遍體

梁武帝狀貌殊特日角龍顏重嶽虎顧舌文八字項有

浮光身映日無影兩髀駢骨項上隆起有文在右手曰武

初為司州刺史有沙門自稱僧憚謂帝曰君項有伏龍
非人臣也復求莫知所之

簡文帝方頤豐下鬚鬢如畫直髮委地雙眉翠色項毛
左旋連錢入背手執玉如意不相分辨盼睐則目光燭
人

元帝背生黑子巫媪見曰此大貴兆當不可言

又云帝
初生患

眼高祖自以意
治之遂盲一目

陳武帝身長七尺五寸日角龍顏垂手過膝

文帝美容儀舉動方雅造次必遵禮法

宣帝美容儀身長八尺三寸手垂過膝有勇力

北齊神武帝目有精光長頭高顙齒白如玉

文襄帝年十三神清雋爽便若成人

文宣帝黑色大頰銳下鱗身重踝

孝昭帝身長八尺腰帶十圍儀望風表迥然獨秀

武成帝儀表瓌傑神武為帝聘蠕蠕太子菴羅辰女號
隣和公主帝時年八歲冠服端嚴神情閑遠華戎歎異

後主美容儀

梁太祖山庭月角舜目堯眉鸞鳳之姿自然也

末帝美容儀

智識

真人未興雄才間出雖統乎舊物尚闕於皇階而式遏
橫流頗關於讖象其或智參妙有識亮機先變而能通
謀無遺策稽成敗於度內權禍福於鼓中燦書史而可
觀騰風徽於無際豈惟人謀允協俾黎獻之宅心將亦

天險未夷假雋賢而授手取其成算著之於篇

蜀先主與龐統從容宴語問曰卿為周公瑾

周瑜字

功曹

孤到吳聞此人密有白事勸仲謀

孫權字

相留有之乎在

君為君卿其無隱統對曰有之先主歎息曰孤時急危

當有所求故不得不往殆不免周瑜之手天下智謀之

士所見畧同耳時孔明

諸葛亮字

諫孤莫行其意獨篤亦慮

此也孤以仲謀所防在北當賴孤為援故決意不疑此

誠出於險途非萬全之計也

吳孫堅漢靈帝末為別部司馬時邊章韓遂作亂涼州
中郎將董卓拒討無功中平三年遣司空張溫行車騎
將軍西討章等溫表請堅與叅軍事屯長安溫以詔書
召卓卓良久乃詣溫溫責讓卓卓應對不順堅時在坐
前耳語謂溫曰卓不悔罪而鷓張大語宜以召不時至
陳軍法斬之溫曰卓素著威名於隴蜀之間今日殺之
西行無依堅曰明公親率王兵威震天下何賴於卓觀
卓所言不假明公輕上無禮一罪也章遂跋扈經年當

以時進討而卓云未可沮軍疑衆二罪也卓受任無功
應召稽留而軒昂自高三罪也古之名將仗鉞臨衆未
有不斷斬以示威者也是以穰苴斬莊賈魏絳戮揚干
今明公垂意於卓不即加誅虧損威刑於是在矣温不
忍發舉乃曰君且還卓將疑人堅因起出章遂聞大兵
至黨衆離散皆乞降軍還議者以軍未臨敵不斷功賞
然聞堅數卓三罪勸温斬之無不歎息拜堅議郎後靈
帝晏駕卓擅朝政橫恣堅聞之拊膺歎曰張公昔從吾

言朝廷今無此難也

大帝父堅亡兄策起事大帝嘗隨從每參同計謀策甚
竒之自以為不及也先主定蜀大帝以彼已得益州令
諸葛瑾從求荊州諸郡先主不許曰吾方圖涼州涼州定
乃盡以荊州與吳耳大帝曰此假而不反而欲以虛辭
引耶遂置三郡長史分荊州東西

嘉禾四年魏文帝遣使求雀頭香大貝明珠象牙犀角
瑇瑁孔雀翡翠鬪鳴長鳴鷄羣臣奏曰荆揚二州貢有

常典魏所求珍玩之物非禮也宜勿與大帝曰昔惠施
尊齊為王客難之曰公之學去尊今王齊何其倒也惠
子曰有人於此欲擊其愛子之頭而石可以代之子頭
所重而石所輕也以輕代重何為不可予方有事於西
北江表元元恃主為命非我愛子邪彼所求者於我瓦
石耳孤何惜焉彼在諒闇之中而所求若此寧可與言
禮哉皆具以與之

赤烏七年步騭朱然等上疏曰自蜀還者咸言欲背盟

與魏交通多作舟船繕治城郭又蔣琬守漢中聞司馬懿南向不出兵乘虛以犄角之反委漢中還近成都事已彰灼無所復疑宜為之備大帝揆其不然曰吾待蜀不薄聘享盟誓無所負之何以致此又司馬懿前來入舒旬日便退蜀在萬里何知緩急而便出兵乎昔魏欲入漢川此間始嚴亦未舉動會聞魏還而止蜀寧可復以此有疑邪又人家治國舟船城郭何得不護今此間治軍寧復欲以禦蜀耶人言甚不可信朕為諸君破家

保之蜀竟自無謀如大帝所籌

朱異為揚武將軍得魏將文欽詐降密書與異欲令自迎異表呈欽書因陳其偽不可便迎大帝詔曰方今北土未一欽云欲歸命宜且迎之若嫌其有譎者但當設計網以羅之盛重兵以防之耳乃遣呂據督二萬人與異并力至北界欽果不降

景帝時諸葛恪為孫峻所殺後朝臣有乞為恪立碑以銘其勲績者博士盛沖以為不應帝曰盛夏出軍士卒

傷損無尺寸之功不可謂能

王欽若等按諸葛恪傳

違衆出軍無功而還受

托孤之任死於豎子之手不可謂智冲議為是遂寢

宋高祖時毛循之父瑾為梁州刺史為譙縱所殺循之
西討不克後遣朱齡石伐蜀循之固求行高祖慮循之
至蜀必多所誅殘土人既與毛氏有嫌亦當以死自固
故不許

梁簡文帝年十一便能親庶務歷試藩政所在著美特
為高祖所愛焉

北齊神武帝以杜弼為大行臺郎中弼以文武在位罕
有廉潔言之於帝帝曰弼來我語爾天下濁亂習俗已
久今督將家屬多在關西黑獺常相招誘黑獺後周人
文帝也人
情去留未定江東復有一吳兒老翁蕭衍者專事衣冠
禮樂中原士大夫望之以為正朔所在我若急作網法
不相饒借恐督將盡投黑獺士子悉奔蕭衍則人物流
散何以為國爾宜少待吾不忘之

文襄帝為渤海王世子時年十二神情雋爽便若成人

神武試問以時事得失辨析無不中禮自是軍國籌策皆預之

文宣帝少有大度志識沈敏外柔內剛果敢能斷雅好吏事測始知終理劇處繁終日不倦初踐大位留心政術以法馭下公道為先或有違犯憲章雖密戚舊勳必無容舍外內清淨莫不祇肅至於軍國幾務獨決懷抱規模宏遠有人君大畧

廢帝為皇太子時年六歲性敏慧初學反語於跡字下

注云自反時侍者未達其故太子曰跡字足傍亦為跡
豈非自反耶嘗宴北宮獨令河間王勿入左右問其故
太子曰世宗遇賊處河間王復何宜在此

孝昭帝自居臺留心政術嫻明簿領吏所不逮及正位
宸居彌所尅勵輕徭薄賦勤恤人隱內無私寵外收人
物雖后父位尊亦待遇無別日昃臨朝務知人之善惡

聰察

夫表微之監禮經實著於嘉猷辨惑之辭先聖嘗形於

善荅苟甄明之或爽將邪正以罔分是以南面之君嚮
明而治必資睿哲以懋丕圖歷數或屯餘閏斯作遐觀
敏識咸契言機知臣者有則哲之明擿伏者無非辜之
舉雖謳謠獄訟顧寶命之未融而博達聰明諒簡書而
可挹

蜀先主定益州以李恢為功曹書佐主簿後為虜所
誣引恢謀反有司執送先主明其不然更遷恢為別駕
從事

吳大帝年少時兄策使呂範典主財計帝時私從有求
範必關白不敢專許當時以此見望大帝守陽羨長有
所私用策或料覆功曹周谷輒為傳著簿書使無譴問
大帝臨時悅之及後統事以範忠誠厚見信任以谷能
欺更簿書不用也後範為揚州牧性好威儀時人有白
範與賀齊奢麗夸綺服飾僭擬王者大帝曰昔管仲踰
禮桓公優而容之無損於霸今子衡公苗

子衡呂範字
公苗賀齊字

身無夷吾之失但其器械精好舟車嚴整耳此適足作

軍容何損於治哉告者乃不敢復言

廢帝出西苑方食生梅使黃門至中藏取蜜漬梅蜜中有鼠矢召問藏吏藏吏叩頭帝問吏曰黃門從汝求蜜耶吏曰向求實不敢與黃門不服侍中刁玄張邠啟黃門藏吏辭語不同請付獄推盡帝曰此易知耳令破鼠矢矢裏燥帝大笑謂玄邠曰若矢先在蜜中中外當俱

濕今外濕裏燥必是黃門所為黃門首服左右莫不驚

悚一云廢帝使黃門以銀椀并蓋就中藏吏取交州所獻甘蔗錫黃門先恨藏吏以鼠矢投錫中啟言藏吏

不謹帝呼吏持錫器入問曰此器既蓋之且有掩覆無緣有此黃門將有恨於汝邪吏叩頭曰嘗從某求宮中莞席宮席有數不敗與亮曰必是此也復問黃門具首伏即於目前加禿鞭斥付外署

宋文帝時孟顛為會稽太守謝靈運以侍中退居郡中頗輕顛所為遂構讐隙顛因靈運橫恣百姓驚擾乃表其異志發兵自防露板上言靈運馳至京都詣闕上表帝知其見誣不罪也不欲使東歸以為臨川內史加秩中二千石

孝武帝時王玄謨為雍州刺史民間訛言玄謨欲反時

柳元景當權元景弟僧景為新城太守以元景之勢制令南陽順陽上庸新城諸郡並發兵討玄謨玄謨令內外晏然以解衆惑馳啟帝具陳本末帝知其虛馳遣主書吳喜公撫慰之

南齊太祖初為齊公時四貴輔政員外郎卞彬謂太祖曰外間有童謠云可憐可念尸著服孝子不在日代哭列管甃鳴死滅族尸著服褚字邊衣也孝除子以日代者謂褚淵也列管簫也彬退太祖笑曰彬自作此

武帝永明元年謝超宗既賜死明年超宗門生王永先又告超宗子才卿死罪二十餘條世祖疑其虛妄以才卿付廷尉辨之不實見原永先於獄盡之

梁高祖時劉之亨為湘東王行臺丞常督衆大致克復軍士有功皆錄唯之亨為蘭欽所訟執政因而陷之故封賞不行但復本位而已久之帝讀陳湯傳恨其立功絕域而為文吏所抵宦者強僧喬曰外聞論者竊謂劉之亨似之帝感悟乃封為臨江子固辭不拜

北齊神武為東魏大將軍時李密為襄州刺史侯景外
叛誘密執之授以官爵景敗歸朝帝以密從景非本心
不之罪也

文襄帝為東魏大將軍時宋遊道為高隆之等所誣是
時朝士皆忿謂遊道不濟而帝聞其與隆之相抗之言
謂楊遵彥曰此真是鯁直大剛惡人遵彥曰辟之畜狗
本取其吠今以數吠殺之恐將來無復吠狗詔付廷尉
遊道坐除名帝使元景康謂曰卿蚤逐我向并州不爾

他經畧殺卿遊道從至晉陽以為大行臺吏部

梁太祖開平中晉州汾西縣百姓蔡奉言論本州游奕將李建不法一十二事帝覽奏曰李建職司防察事極重難若狗愛憎便罹刑網則何以委用邊吏因命奉言移貫內地

器度

夫所享厚者其量必大所圖廣者其志必遠况據偏方而鼎峙承間邑而瓜分建元改號開國承家故有英異

之姿發於經綸之際宏遠之度存於聽斷之間不為疑駭而變常不為喜怒而改色使仇敵不能以計撓臣下不得以智闕厭服賢豪容畜民衆所以能成其基業者其繇是矣

蜀先主微時舍籬上有桑樹生高五丈餘遙望見童童如小車蓋先主與宗中諸小兒於樹下戲言吾必當乘此羽葆蓋車先主不甚樂讀書喜狗馬音樂喜怒不形於色好交結豪俠年少爭附之既為益州牧時馬超來

降先主待之厚超嘗呼先主字關侯怒請殺之先主曰
人窮來歸我卿等怒以呼我字故而殺之何以示於天
下也張飛曰如是當示之以禮明日大會請超入關張
並杖刀立超顧坐席不見關張見其立也乃大驚遂止
不復呼字明日歎曰我今乃知其所以敗為呼人主字
幾為關張二將所殺自後乃尊事先主

吳大帝性度弘朗仁而多斷好俠養士始有知名侔於
父兄矣

南齊太祖少沉深有大量寬嚴清儉喜怒無色從諫察

謀以威嚴得重

一云少有大量喜怒不形於色深沈靜默嘗有四海之心

梁簡文帝器宇寬弘未嘗見喜愠色

陳高祖少倣儻有大志不治生產既長讀書多武藝明
達果斷為當時所推服

宣帝少器度弘厚有人君之量

北齊神武深沈有大度輕財重士為豪俠所宗

文宣帝不好戲弄深沈有大度神武嘗試觀諸子意識

各使治亂絲帝獨抽刀斬之曰亂者須斬神武是之又
各配兵四出而使甲妓偽攻之文襄等怖撓帝乃勒衆
與彭樂敵樂免胄言情猶擒之以獻幼時師事范陽盧
景裕默識過人景裕不能測也神武為東魏相國既薨
猶秘凶事衆情疑駭帝雖內嬰巨痛外若平常人情頗
安及文襄遇害事出倉卒內外震駭帝神色不變指麾
部分自若嚮斬羣賊而漆其頭徐宣言曰奴反大將軍
被傷無大苦也當時內外莫不驚異焉乃赴晉陽親總

庶政務從寬厚有不便者咸蠲損焉

孝昭帝聰敏有識度深沉能斷不可窺測

梁太祖多大畧恢弘遠度合於霸王之道

才藝

夫以宣尼將聖之資不忘於鄙事姬旦事神之旨自謂
於多才挹遺籍之芳風亦先民之懿範矧或彌綸百揆
總制萬機而能濬發清衷旁精曲藝雖人君之度豈獨
在茲然天縱之能蓋其餘力傳諸汗簡有助徽音

宋高祖初不能書劉穆之謂曰但縱筆為大字一字徑尺無嫌大既足有所包且其名亦美高祖從之所書一紙不過六七字

文帝善隸書

孝武帝雄決愛武長於騎射

後廢帝凡諸鄙事過目即能鍛金銀裁衣作帽莫不精絕未嘗吹篪執管便韻

南齊太祖工草隸書奕碁第二品

鬱林王好隸書武帝特所鍾愛勅皇孫手書不得妄出以貴之

梁高祖有文武才幹六藝備嫻碁登逸品陰陽緯候卜筮占決並悉稱善又撰金策三十卷草隸尺牘騎射弓馬莫不竒妙

元帝於技術無所不該嘗不得南信筮之遇剝之艮曰南信已至今當遣左右李心往看果如所說賓客咸驚其妙凡所占決皆然

後梁後主善弓馬遣人伏地著帖琮馳馬射之十發十
中持帖者亦不懼

陳高祖涉獵史籍好讀兵書明緯候孤虛遁甲之術多
武藝明達果斷為當時所推服

宣帝有勇力善騎射

東魏孝靜帝能挾石獅子以踰墻射無不中

冊府元龜卷一百九十

欽定四庫全書

冊府元龜卷一百九十一 宋 王欽若等 撰

閏位部

法制 政令

法制

夫有國家者曷嘗不制事典立軌度因時變而建民極者哉嬴秦之世多所改作洎南北迭王以訖于梁亦復損益前訓有所更創斟酌物宜於焉垂法蓋以申畫一

之文著惟行之令一統類而嚴紀律也史氏所記咸得而徵焉

秦始皇帝二十六年制曰朕聞太古有號毋謚中古有號死而以行為謚如此則子議父臣議君也甚無謂朕弗取焉自今已來除謚法朕為始皇帝後世以計數二世三世至千萬世傳之無窮分天下以為三十六郡郡置守尉監更名民曰黔首一法度衡石丈尺車同軌書同文

三十一年十二月更名臘曰嘉平

太原真人茅盈內紀曰始皇三十一年九

月庚子盈曾祖父濛乃於華山之中乘雲駕龍白日升天先是其邑謠歌曰神仙得者茅初成駕龍上升入太清時下玄洲戲赤城繼世而往在我盈帝若學之臘嘉平始皇聞謠歌而問其故父老具對此仙人之謠歌勸帝求長生之術於是始皇欣然乃有尋仙之志因改臘曰嘉平

吳大帝時令諸居任遭三年之喪皆須交代乃去然多犯者嘉禾六年使羣臣議立制胡綜以為宜定大辟之科又使代未至不得告告者抵罪顧雍等同綜議從之其後吳令孟仁聞喪輒去陸遜陳其素行減死一等自

此遂絕

宋高祖永初元年七月壬子詔曰反叛淫盜三犯補治士本謂事三犯終無悛革主者頃多并數衆事合而為三甚違立制之旨宜更申明

八月詔曰諸處冬使或遣或不事役宜省今可悉停唯元正大慶不得廢耳郡縣遣冬使詣州及都督府者亦宜同停

閏八月詔曰主者處按雖多所諮詳若衆官命議宜令

明審自頃或總稱參詳於文漫畧自今有厝意者皆當
指名其所見不同依舊繼啓

二年三月制限荊州府置將不得過二千人吏不得過
一萬人州置將不得過五百人吏不得過五千人兵士
不在此限

孝武帝即位初置殿門及上閣門

孝建元年江夏王義恭與驃騎大將軍竟陵王誕奏曰
臣聞侑懸有數等級異儀珮笏有制卑高殊序斯蓋上

括之洪模範世之明訓而時至彌流物無不敝借侈繇俗軌度非古晉代東徙舊法淪落侯牧典章稍與事曠名實一差難以卒變章服崇濫多歷年所今樞機更造皇風載新耗弊未充百用思約宜備品式之律以定損益之條臣等地居枝旼位叅台輔遵正之首請以爵先致貶之端宜從戚始輒因暇日共叅愚懷應加省易謹陳九事雖懼匪衷庶竭微款伏願陛下聽覽之餘薄垂照納則上下相安表裏和穆矣詔付外詳有司奏曰車

服以庸虞書茂典名器慎假春秋明誠是以上方所制
漢有嚴律諸侯竊服雖親必罪降於頃世下僭滋極器
服裝飾樂舞音容通於王公達於衆庶上下無辨民志
靡一義恭所陳實允禮度九條之格猶有未盡謹共附
益凡二十四條聽事不得南向坐施帳并藩國官正冬
不得跣登國殿及夾侍國師傅令及油戟公主王妃傳
令不得朱服輦不得重桐鄣扇不得雉尾劍不得鹿盧
形槩眊不得孔雀白氅夾轂隊不得絳襖平乘誕馬不

得過二匹胡伎不得綵衣舞伎正冬著袿衣不得裝面
冬會不得鐸舞柸柈舞長躡透狹舒劔博山綵大幢升
五按自非正冬會奏舞曲不得舞諸妃主不得著緹帶
信幡非臺省官悉用絳郡縣內史相及封內官長於其
封君既非在三罷官則不復追敬不合稱臣宜從下官
而已諸鎮常行車前後不得過六隊白直夾轂不在其
限刀不得過銀銅為飾諸王女封縣主諸王子孫襲封
之王妃及封侯者夫人行並不得鹵簿諸王子繼體為

王者婚喪吉凶悉依諸國公侯之禮不得同皇弟皇子
車非輅車不得油幢平乘舫皆下兩頭作露平形不得
擬象龍舟悉不得朱油帳鏤不得作五花及豎筍形詔
可

二年制中丞與尚書令分道雖丞郎下朝相值亦得斷
之餘內外衆官皆授停駐

大明元年三月制大臣加班劔者不得入宮城門

二年十二月諸王及妃主庶姓位從公者喪事聽設凶

門餘悉斷

六年九月制沙門致敬人主

七年四月詔曰自非臨軍戰陣一不得專殺其罪甚重
辟者皆如舊先上須報有司嚴加聽察犯者以殺人罪
論

五月詔曰自今刺史守宰動民興軍皆須手詔施行唯
邊隅外警及姦孽內發變起倉卒者不從此例

長沙王道憐孫祇大明中為中書郎太宰江夏王義恭

領中書監服親不得相臨表求解職世祖詔曰昔二王
兩謝俱至崇禮自今三臺五省悉同此例

沈統大明中為著作佐郎先是五省官所給幹僮不得
雜役太祖世坐以免官者前後數百人統役輕過差有
司奏免世祖詔曰自頃幹僮多不祇給主可量聽行杖
得行幹杖自此始也

明帝泰始元年詔諸將吏二千石以下遭三年喪聽居
終寧庶人復除徭役

三年制太子乘象輅

六年制太子元正朝賀服袞冕九章衣

南齊武帝永明七年十月詔曰三季澆浮舊章陵替吉
凶奢靡動違矩則或裂錦繡以競車服之飾塗金鏤石
以窮瑩域之麗至班白不婚露棺累葉苟相媵街罔顧
大典可明為條制嚴勒所在悉使畫一如復違犯依事

糾奏

永明中世祖以婚禮奢借勅諸王納妃上御史六
宮依禮正棗栗脯脩加以香澤花粉其餘衣物皆

停唯公主降嬪則
止遺舅姑而已

明帝建武元年十一月革永明之制依晉宋舊典太子以師禮敬少傅

梁武帝天監三年都令使王謹之列自江左以來郊廟祭祀帝已入齋百姓尚哭以為乖禮何佟之等奏按禮國門在臯門外今之籬門是也今古殊制若禁凶服不得入籬門為太遠宜以六門為斷詔曰六門之內士庶甚多四時蒸嘗俱斷其哭若有死者棺器須來既許其大而不許其細也致齋日去廟二百步斷哭

北齊文宣帝受禪詔曰頃者風俗流宕浮競日滋家有
吉凶務求殊異婚姻葬喪之費車服飲食之華動竭歲
資以營日富又奴僕帶金銀婢妾衣羅綺始以勑出為
奇後以過前為麗上下貴賤無復等差今運屬惟新思
蠲徃弊反朴還淳納民軌物可量事具立條式使儉而
獲中

梁太祖開平元年四月詔在京百司及諸軍州縣印一
例鑄換其篆文則各如舊

八月詔曰朝廷之儀封冊為重用報勲烈以降隆榮固合親臨式光典禮彞章久缺自我復行今後每封冊大臣宜令有司備臨軒之禮稱朕意焉

九月勅以近年文武官諸道奉使皆於所在分外停住踰年涉歲未聞歸闕非唯勞費州郡抑且侮慢國經臣節既虧憲章安在自今後兩浙福建廣州南安邕容等道使到發許任一月湖南洪鄂黔桂許任二十日荆襄同雍鎮定青滄許任十日其餘側近不過三五日凡來

往道路據遠近里數日行兩驛如遇疾患及江河阻隔委所在長吏具事由奏聞如或有違當行朝典命御史點檢糾察以做慢官

二年七月帝曰車服以庸古之制也貴賤無別罪莫大焉應內外將相許以銀飾鞍勒其刺史都將內諸司使以降祇許用銅冀定尊卑永為條制仍令執法官糾察之

八月兩浙錢鏐奏請重鑄換諸州新印

三年七月勅大內皇牆使諸門素來未得嚴謹將令整肅須示條章宜令控鶴指揮應於諸門各添差控鶴官兩人守帖把門其諸司使并諸司諸色人竝勒於左右銀臺門外下馬不得將領行官一人輒入門裏其逐日諸道奉進客省使於千秋門外排當訖勒控鶴官昇臺至內門前準例令黃門殿直以下昇進輒不得令諸色一人到千秋門內其章善門仍令長官關鎖不用逐日開閉是日又勅皇牆大內本尚深嚴宮禁諸門豈宜輕

易未當條制交下因循苟出入之無常且公私之不便
須加鈐轄用戒門閭宜令宣徽院使等切准此處分

八月勅建國之初用兵之罷諸道章表皆繫軍機不欲
滯留用防緩急其諸道所有軍事申奏宜令至右銀臺
門委客省畫時引進諸道公事即依前四方館准例收
接

十月勅司門過所先是司門郎中貢外郎出給今以寇
盜未平恐漏姦詐令宰臣趙光逢專判凡諸給過所先

具狀經中書點檢判下即本判郎官擬狀出給

四年正月勅公事難於稽遲居處悉皆遙遠其逐日當直中書舍人及吏部司封知印郎官少府監及篆印文兼書寫告身人吏等並宜輪次於中書側近宿止

四月帝過朝邑見鎮將位在縣令上問左右或對曰宿官秩高帝曰令長字人也鎮使捕盜耳且鎮將多是邑民柰何得居民父母上是無禮也至是勅天下鎮使官秩無高卑位在邑令下

九月勅魏博管内刺史比來州務竝委督郵遂使曹官

擅其威權州牧同於閑冗俾循通制宜塞異端竝宜依

河南諸州例刺史得以專達

議者曰唐朝憲宗時烏重裔為滄州節度使嘗稱河

朔六十年能抗拒朝命者以奪刺史格與縣令職而自作威福且若二千石各得其柄又有鎮兵雖安史挾姦

豈能據一壟而叛哉遂奏以所管德棣景三州各還刺史職分州兵卒隸收管是後雖幽鎮魏三州以河北舊

風自相更襲在滄州一道獨稟命受代自重裔制置使然也則梁氏之更張正合其事矣

十一月乙巳詔曰關防者所以譏異服察異言也况天

下未息兵民多姦改形易衣覘我戎事比者有謀皆以

詐敗而未嘗罪所過地叛將逃卒竊其妻孥而影附使
者亦未嘗詰其所經今海內未同而緩法弛禁非所以
息奸詐止奔亡也應在京諸司不得擅給公驗如有出
外須執憑繇者其司門過所先須經中書門下點檢宜
委宰臣趙光逢專判出給俾繇顯重冀絕姦源仍下兩
京河陽及六軍諸衛御史臺各加鈐轄公私行李復不
得帶挾家口向西其襄鄧鄜延等道竝同處分
五年二月詔左右金吾大將軍待制官各奏事

乾化元年五月詔左右銀臺門朝叅諸司使庫使已下不得帶從人出入親王許一二人執條版手簡餘悉止門外闌入者抵律闔守不禁與所犯同先時門通內無門籍且多勲戚車騎衆者尤不敢呵察至是有一客星凌犯上言者遂令止格

末帝龍德元年春正月癸巳詔諸道入奏判官宜令御史臺點檢各從正衙退後便於中書門下公叅辭謝如有違越具名衙聞奏應面賜章服仍令各門使取本官

狀申中書門下受勅後方可給入新銜

政令

漢高帝伐秦繼周以火承木說者謂秦為閔位而蜀吳
宋齊暨乎朱梁厥義均矣其立政其施令出於君而被
於民者或適一時之宜或為子孫之法載於方策亦有
可觀然而史遷紀秦陳壽志吳蜀其事多畧宋齊而下
乃章章焉古人有言非知之艱行之惟艱若鬱林東昏
之時雖有政令顧其治何如哉

秦始皇十六年九月初令男子書年

三十三年初縣禁不得祠

蜀後主建興二年春閉關息民

吳大帝黃武五年春令曰軍興日久民離農畔父子夫婦不能相卹孤甚憫之今北虜縮竄方外無事其下州郡有以寬息

嘉禾三年正月詔兵久不輟民困於役歲或不登其寬諸逋勿復督課

太元元年十二月詔省徭役減征賦除民所患苦

宋高祖永初元年六月即位詔曰夫銘功紀勞有國之
要典慎終追舊在心之所隆自大業創基十有七載世
路迤邐戎車歲動自東徂西靡有寧日實賴將帥竭心
文武盡効寧內拓外迄用有成威靈遠著寇逆消蕩遂
當揖讓之禮猥享天人之祚念功檢勞無忘鑒寐凡厥
誠勤宜同國慶其酬賞復除之科以時論舉戰亡之身
厚加賻贈

七月丁亥詔原放劫賊餘口沒在臺府者諸徙家竝聽還本土又運船不復下諸郡輸出悉委都水別量臺府所須皆別遣主帥與民和市即時裨直不復更責租民求辦又停廢虜車牛不得以官威假借又以市稅繁苦優量減降從征關雒殞身戰場幽沒不反者贍賜其家二年正月丙寅詔斷金銀塗已卯禁喪事用銅釘四月己卯朔詔曰淫祠惑民費財前典所絕可竝下在所除諸房廟其先賢及以勲德立祠不在此例

文帝元嘉四年三月壬寅禁斷夏至日五絲命縷之屬
富陽令諸葛闡之之議也

八年三月戊申詔曰頃軍役殷興國用增廣資儲不給
百度尚繁宜存簡約以應事實內外可通共詳思務令
節儉

十七年十一月詔曰州郡估稅所在市調多有煩刻山
澤之利猶或禁斷役召之品遂及稚弱諸如此比傷治
害民自今咸依法令務盡優免如有不便即依事別言

不得苟趣一時以乖隱卹之旨主者明加宣下稱朕意
焉

孝武帝以元嘉三十年四月即位七月辛酉詔曰百姓
勞弊徭賦尚繁言念守文宜崇約損凡用非軍國宜悉
停功可省細作并尚方雕文靡巧金銀塗飾事不關實
嚴為之禁供御服膳減除遊侈水陸捕採各順時月官
私交市務令優衆其江海田池公家規固者詳所開弛
貴戚競利悉皆禁絕

孝建元年正月戊申詔曰首食尚農經邦本務貢士察
行寧朝常道內難甫康正訓未洽衣食有仍耗之弊選
造無觀國之美昔衛文勤民高宗恭默卒能收賢品穴
大殷季年朕每側席疚懷無忘鑒寐凡諸守莅親民之
官可詳申僭條勤盡地利力田善畜者所在具以名聞
褒甄之科精為其格四方孝秀非才勿舉獻荅允值即
就銓擢若止無可採猶賜除署若有不堪酬奉虛竊榮
薦遣還田里加以禁錮尚書百官之元本庶績之樞機

丞郎列曹局司有在自頃事無巨細悉歸令僕非所謂
衆材成構羣能濟業者也可更明體制咸責厥成糾覈
勤惰嚴施賞罰

大明二年閏十二月庚子詔曰夫山處崑居不以魚鼈
為禮頃歲多虞軍調繁切違方設賦本濟一時而主者
玩習遂為常典柁幹瑤琨任土作貢積羽羣輕終致深
弊永言弘革無替朕心凡寰衛貢職山淵採捕皆當詳
辨產殖考順歲時勿使牽課虛懸睽忤氣序庶簡約之

風有孚於品性惠敏之訓無漏於幽仄

七年五月丙子詔曰自今刺史守宰動民興軍皆須手
詔施行唯邊隅外警及奸釁內發變起倉卒者不從此
例

七月丙申詔曰江海田池與民共利歷歲未久浸以弛
替名山大川徃徃占錮有司嚴加檢糾重明舊制

八年正月甲戌詔曰東境去歲不稔宜廣商貨遠近販
鬻米者可停道中雜稅其以仗自防悉勿禁

前廢帝以大明八年閏五月即位六月辛未詔曰朕以
眇身夙紹洪業敬御天威欽對靈命仰遵凝緒日鑒前
圖實可以拱默守成貽風長世而寶位告始萬寓改屬
惟德弗明昧於大道思宣睿範弘茲簡恤可具詢執事
詳訪民隱凡典令密文繁而傷治闕市儻稅事施一時
而姦吏舞文妄興威福加以氣緯殊方偏頗滋甚宜其
寬徭輕憲以救民切御府諸署事不須廣雕文篆刻無
施於今悉宜并省以酬民願蕃王質貨一皆禁斷外便

具條以聞

明帝泰始三年八月丁酉詔曰古者衡虞置制蠲天不收川澤產育登器充御所以繁阜民財養遂生德頃商販逐末競早爭新折未實之果收豪家之利籠非膳之翼為戲童之資豈所以還風尚本損華務實宜修道布仁以革斯蠹自今鱗介羽毛肴核衆品非時月可採器味所須可一皆禁斷嚴為科制

六年十二月癸巳以邊難未息制父母陷異域悉使婚

官

南齊太祖建元元年四月詔曰自廬井毀制農桑易業
鹽鐵妨民貨鬻傷治歷代成俗流蠹歲滋思拯遺弊革
末反本使公不專利氓無失業二宮諸王悉不得營立
屯邸封畧山湖太官池籩宜停稅入

五月辛未詔曰設募取將懸賞購士蓋出權宜非曰常
制頃世道艱險浸以成俗且長逋逸開罪山湖是為黥
刑不辱亡竄無咎自今以後可斷衆募

武帝永明七年二月詔曰春頒秋斂萬邦所以惟懷柔
遠能邇兆民所以允殖鄭渾宰邑因姓立名王濬剖符
戶口殷盛今產子不育雖炳常禁比聞所在猶或有之
誠復禮以貧殺抑亦情繇俗澹宜節以嚴威敦以惠澤
主者尋舊制詳蠲卹之宜務存優厚

四月詔曰婚禮下達人倫攸治周官有媒氏之職國風
興及時之詠四爵內陳義不期侈三鼎外列事豈存奢
晚俗浮麗歷茲永久每思懲革而民未知禁乃聞同牢

之費華泰尤甚膳羞方丈有過王侯富者扇其驕風貧者恥躬不逮或以供帳未具動致推遷年不再來盛時忽往宜為節文頒之士庶竝可擬則公朝方摠供設合
豔之禮無虧寧儉之儀斯在如故有違繩之以法

永明中勅親近不得輒有申薦人士免官寒人鞭一百
鬱林王隆昌元年正月辛亥詔詢訪獄市博聽謠俗傷
風損化各以條聞主者詳為條格

海陵王即位詔曰周設媒官趣及時之制漢務輕徭在

休息之典所以布德弘教寬俗阜民朕君制八紘志敷
九惠而習俗之風為弊未改靜言多愠無忘婚嫁宜嚴
更申明必使禽幣以時標梅息怨正厨諸役舊出州郡
徵吏民以應其數公獲二旬私累數朔又廣陵年常遞
出千人以助淮戍勞擾為煩抑亦芑苴是育今竝可長
停別量所出諸使材長路都防城直縣為劇尤深亦宜
禁斷

延興元年八月乙卯申明織成金薄緣花錦綉履之禁

明帝建武元年詔曰守職之吏多違舊典存私害公實興民蠹今商旅稅石頭後渚及夫鹵借倩一皆停息所在凡厥公宜可即符斷主曹詳為其制憲司明加聽察十月詔曰自今雕文篆刻歲時光新可悉停省

十一月詔曰邑宰祿薄俸微不足代耕雖任土常貢亦為勞費自今悉斷

東昏侯初即位詔辨括選序訪搜貧屈

永元元年詔研策秀孝考課百司

梁高祖初為南齊大司馬錄尚書事下令曰永元之季
乾維落紐政實多門有殊衛文之世權移於下事等曹
公之時遂使閹尹有翁媪之稱高安有法堯之旨鬻獄
販官銅山護澤開塞之機養成小醜直道正義擁抑彌
年懷怨抱理莫知誰訴姦吏因之筆削自己豈直賈生
流涕許伯哭泣而已哉今理運惟新政刑得所矯革流
弊實在茲日可通檢尚書衆曹東昏時諸諍訟失理及
主者淹傳不時施行者精加訊辨依事議奏

天監元年詔曰成務弘風肅厲內外實繇設官分職互相懲糾而頃者拘常准以見失方奏多容違愆莫肯執咎憲綱日弛漸以為俗令端右可以風聞奏依元熙舊

制

四年正月丙午省鳳皇銜書伎

六年正月己卯詔曰夫有天下者義非為己凶荒疾厲兵革水火有一於斯責歸元首今祝史請禱繼諸不善以朕身當之永使災害不及萬姓俾茲下民長蒙寧息

不得為朕祈福以增其過時班遠邁咸令遵奉

九年五月己亥詔曰朕遠聽思治無忘日昃而百司羣
務其途不一隨時適用各有攸宜若非總會衆言無以
備茲親覽自今臺閣省府州縣鎮戍應有職僚之所時
共集議各陳損益具以奏聞

十五年正月己巳詔曰觀時設教王政所先兼而利之
實惟務本移風致治咸繇此作頃因革之令隨事必下
而張弛之要未臻厥宜民瘼猶繁廉平尚寡所以蚡旒

續而載懷朝玉帛而興歎可申下四方政有不便於民者所在具條以聞守宰若清潔可稱或侵漁為蠹分別奏上將行黜陟長吏勸課躬履隄防勿有不修致妨農事關市之賦或有未允外時叅量優減舊格

十七年正月丁巳朔詔曰夫樂所自生含識之常性厚下安宅馭世之通規矜恤庶民無忘待旦亟弘生聚之畧每布寬恤之恩而編戶未滋遷徙尚有輕去故鄉豈其本志資業殆闕自返莫繇巢南之心亦何能弭今開

元發歲品物惟新思俾黔黎各安舊所使居無曠土邑
靡游民鷄犬相聞桑柘交吟凡天下之民有流移他境
在天監十七年正月一日以前可開恩半歲悉聽還本
蠲課三年其流寓過遠者量加程日若有不樂還者即
使著籍為民准舊課輸若流移之後本鄉無復居宅者
村司三老及於親屬即為詣縣占請村內官地官宅令
相容受使戀本者還有所託凡坐市肆諸職割盜褻減
應被籍者其田宅車牛是民生之具不得悉以沒入皆

優量分留使得自止其商賈富室不得頓相兼并遁叛
之身罪無輕重竝許首出還復民伍若有拘限自還本
役為之條格咸使知聞

普通三年五月詔四方民所疾苦咸即以聞

大同五年三月己未詔曰朕四聰既闕五職多蔽或可
外牒或致紕繆凡有政事不便於民者州郡縣即皆時
言勿得欺隱使有怨訟當境任失而今而後以為永準
六年八月辛未詔曰經國有體必詢諸朝所以尚書置

令僕丞郎旦旦上朝以議時事前共籌懷然後奏聞頃者不爾每有疑事倚立求決古人有云主非堯舜何得發言便是故放勳之聖猶咨四嶽重華之叡亦待多士豈朕寡薄所能獨斷自今尚書中有疑事前於朝堂參議然後啟聞不得習常其軍機要切前須詔審自依舊典

七年十二月壬寅詔曰古人云一物失所如納諸隍未是切言也朕寒心消志為日久矣每當食投箸方眠撤

枕獨坐懷憂憤慨申旦非為一人萬姓故耳州牧多非
良才守宰虎而傅翼楊阜以是憂憤賈誼所以流涕至
於間謀求取萬端或供厨帳或供厩庫或遣使命或待
賓客皆無自費取給於民又復多遣遊軍稱為防遏姦
盜不止暴掠繁多或求供設或責脚步又行劫縱更相
枉逼良人命盡富室財殫此為怨酷非止一事亦頻勅
禁斷猶自未已有司明加聽採隨事舉奏又復公私傳
屯邸治爰至僧尼當其地界止應依限守視乃至廣加

封固越界分斷水陸採捕及以樵蘇遂致細民措手無所自今有越界禁斷者禁斷之身以軍法從事若是公家創內止不得輒自立屯與公競作以收私利至百姓樵採以供煙爨者悉不得禁及以採捕亦勿呵問若不遵承皆以死罪結正

十一年三月庚辰詔曰皇王在昔澤風未遠故端居玄扈拱默崑廊大道既淪澆波斯逝動競日滋情偽彌作朕負宸君臨百年將半宵漏未分躬勞政事白日西浮

不遑飧飯退居猶被布素含咀匪過藜藿寧以萬乘為貴四海為富惟欲億兆康寧下民乂安雖復三思行事而百慮多失凡遠近分置內外條流四方所立屯傳邸治市埭桁度津稅田園新舊守宰遊軍戍邏有不便於民者尚書州郡各速條上當隨言除省以舒民忠

太清元年八月乙丑王師北伐以南豫州刺史蕭淵明為大都督詔曰今汝南新復嵩潁載清瞻言遺黎有勞鑒寐宜覃寬惠與之更始緣邊初附諸州部內百姓先

有負罪流亡逃叛入北一皆曠蕩不問徃讐并不得挾以私讐而相報復若有犯者三加裁問

元帝承聖元年四月既平侯景下令曰軍容不入國國容不入軍雖子產獻捷戎服從事亞夫不拜義止將兵今匈醜殲夷逆徒殄潰九有既截四海乂安漢官威儀方陳盛禮衛多君子寄是瞻式便可解嚴以時宣勅敬帝太平元年九月詔曰饑寒流移勒歸本土

陳文帝天嘉元年詔曰汙罇土鼓誠則難追畫卵雕薪

或可刪革梁氏末世奢麗已甚芻豢厭於胥史歌鍾列
於管庫土木被朱丹之采車馬飾金玉之珍遂欲澆流
遷訛遂遠朕自諸生頗為內足而家數退素室靡浮華
觀覽時俗嘗所扼腕今妄假時乘臨馭區極屬當淪季
思聞治道非食卑宮自安儉陋俾茲薄俗獲反淳風雕
鏤淫飾非兵器及國容所湏金銀珠玉衣服雜玩悉皆

禁斷

六年詔曰梁室多故禍亂相尋兵甲紛紛十年不解不

逞之徒虐流生氣無賴之屬暴及徂魂江左肇基王者
攸宅金行水位之主木運火德之君時更四代歲逾二
百若有經綸王業縉紳民望忠臣孝子何世無之而零
落山丘變移陵谷咸皆剪伐莫不侵殘玉杯得於民間
漆簡傳於世載無復五株之樹罕見千年之表自天祚
光啟恭惟揖讓爰暨朕躬聿修祖武雖復旌旗服色猶
行祀宋之邦車駕巡遊眇瞻河雒之路故喬山之祀蘋
藻弗虧驪山之墳松柏常守唯戚藩舊壟士子故塋掩

殓未周樵牧猶衆或親屬流隸負土無期子孫冥滅手植何寄漢高祖留連於無忌宋祖惆悵於子房丘墓生哀性靈共惻者也朕所以興言永日思慰幽泉繼前王侯自古忠烈墳冢被發絕後者可檢行修治墓中樹木勿得樵採庶幽顯咸暢稱朕意焉

宣帝太建四年八月戊寅詔曰國之大事受賑與戎師出以律稟策於廟所以乂安九有克成七德自頃掃滌羣穢廓清諸夏乃獫狁之戮力亦帷帳之運籌雖左衽

已戡干戈載戢呼韓來謁亭鄣無驚但不教民戰是謂
棄之仁必有勇無忘武備磻溪之傳韜訣穀城之授神
符文叔懸制戎規孟德頗言兵畧朕既慙暗昧良皆披
覽兼昔經督戎備嘗行陳齊以七步肅之三鼓自得胷
襟指掌可述竝令條制凡十三科宜即班宣以為永準

臣欽若等按毛喜傳喜宣帝初為黃門侍郎帝
將議北伐勅喜撰軍制凡十三條詔頒行天下

十一年五月乙巳詔曰昔軒轅命于風后力牧放勳咨
爾稷契朱虎冕旒垂拱化致隆平爰逮漢列五曹周分

六職設官理務各有攸司亦幾刑措十世彌永竝賴羣才用康庶績朕日昃劬勞思弘治要而機事尚擁政道未凝夕惕于懷固知攸濟方欲仗茲舟楫委成股肱微名責實取寧多士自今應尚書曹府寺內省監司文案悉付局叅議分判其軍國興造徵發選序三獄等事先須詳計然後啟聞凡諸班次務令清乂約法守制較若畫一不得前後乖舛自相矛盾致有枉滯紆意儻文糾聽所知靡有攸赦

十二月己巳詔曰昔堯舜在上茅屋土階禹湯為君藜
杖韋帶至如甲帳珠珞華棖璫未能雍熙徒聞侈欲
朕企仰前聖思求訟平政道多違澆風靡乂至今貴里
豪家金鋪玉舄貧居陋巷羸食牛衣稱物平施何其遼
遠燿烽息役輿賦兼勞文吏姦貪妄動科格重以旗亭
關市稅斂繁多不廣都內之錢非供水衡之費逼過商
賈營謀私蓄靜懷衆弊宜事改張弗弘王道安拯民靈
今可宣勒主衣尚方諸堂署等自非軍國資須不得繕

造衆物後宮僚列若有游長掖廷啟奏即皆量遣太子
秘戲非會禮經樂府倡優不合雅正竝可刪改市估津
稅軍令國章更湏詳定唯務平允別觀離宮郊闕野外
非常饗宴勿復修治并勅内外文武車馬宅舍皆循儉
約勿尚奢華違我嚴規抑有刑憲所繇具為條格標榜
宣示喻朕心焉

後主以太建十四年嗣位四月庚子詔曰朕臨御區宇
撫育黔黎方欲康濟澆薄蠲省繁費奢僭乖衷實宜防

斷絰縷金銀薄及糜物化生土木人綵花之屬及布帛
幅尺短狹輕疎者竝傷財廢業尤成蠹患又僧尼道士
挾邪左道不依經律民間淫祀祆書諸珍恠事詳為條
制竝皆禁絕

癸卯又詔曰中歲克定淮泗爰涉青徐彼土酋豪竝歸
欵罄誠分遣親戚以為質任今舊土淪陷復成異域南北
阻遠未得會同念其分乖殊有愛戀夷狄吾民斯事一
也何獨譏禁使彼離析外不即簡任子館及東館并帶

保任在外者竝賜衣糧頒之酒食遂其鄉路所之阻遠
便發遣船仗衛送必令安達若已預仕官及別有事義
不欲去者亦隨其意

東魏孝靜天平元年十月自雒遷都于鄴十二月詔曰
內外解嚴百司悉依舊章從容雅服不得以袴衫從事
北齊文宣帝天保元年六月詔曰自今以後諸有文啟
論事竝陳要密有司悉為奏聞

武成帝太寧元年詔曰王者所用唯在賞罰賞貴適理

罰在得情然理容進退事涉疑似盟府司勲或有開塞之路三尺律令未窮畫一之道思文王之官人念宣尼之止訟刑賞之宜思獲其所自今諸應賞罰皆賞疑從重罰疑從輕

後主天統四年十二月詔細作之務及所在百工悉罷之

梁太祖開平元年六月癸亥詔以前朝官僚譴逐南荒積年未經昭雪其間有懷抱材器為時所嫉者深負冤

抑仍令錄其名姓盡復官資兼告諭諸道令津致赴闕如已亡歿竝許歸葬以明恩蕩

十二月棣州蒲臺縣百姓王知嚴妹以亂離并失怙恃因舉哀追感自截兩指以祭父母帝以遺體之重不合

毀傷言念村閭何知禮教自今後所在郡縣如有截指

割股不用奏聞

是年諸道多奏軍人百姓割股青齊河朔尤多帝曰此若因心亦足為孝但苟

免徭役自殘肌膚欲以庇身何能療疾竝宜止絕

二年詔禁戢諸軍節級兵士及供奉官受旨殿直以下

各修禮敬

三年正月幸西京勅近年以風俗未泰兵革且繁正月
燃燈廢停已久今屬創開鴻業初建維都方在上春務
達陽氣宜以正月十四十五十六日夜開坊市門一任
公私燃燈祈福

八月勅所在長吏放雜差役兩稅外不得妄有科配自
今後州縣府鎮凡使命經過若不執勅文券竝不得妄
差人驢及取索一物已上又今歲秋田皆期大稔仰所

在切加條流本分納稅及加耗外勿令更有科索切戒所繇人更不得於鄉村乞託擾人

九月制內外使臣復命未見便歸私第者朝廷命使臣下奉行唯於辭見之儀合守敬恭之道近者凡差出使往復皆越常規或已辭而尚在本家或未見而先歸私第但從已便莫稟王程在禮敬而殊非置典章而私舉宜令御史臺別具條流事件具黜罰等奏聞

是月河中奏准宣詔使有銅牌者所至即易騎以遣

十一月甲午祀南郊戊戌制曰夫嚴祀報本所以通神明流澤覃休所以惠黎庶斯蓋邦家不易之道皇王自昔之規敢敦大猷茲惟古義粵朕受命于今三年何嘗不寅畏晨興焦勞夕惕師唐虞之典上則於乾功挹夏殷之源下涵於民極欲使萬方有裕六氣無愆然而志有所未孚理有所未達致姦宄作釁旱濫為災驕將守邊擁牙旗而背義積陰馭氣陵玉燭以干和載考休徵式昭至警朕是以仰高俯厚靡惜於責躬履薄臨淵冀

昭於玄覽兢兢慄慄夙夜匪寧及夫動干戈而必契靈
誅陳犧牲而克章善應苟非天垂丕祐神贊殊休則安
可致夷克渠就不戰之功變沴戾氣作有年之慶况靈
旗北指喪犬羊於亂轍之間飛騎西臨下廊翟若走丸
之易息一隅之煙燧復千里之封疆而又掃蕩左馮討
除峴首故得外戎內夏益知天命之攸歸喙息跂行共
識皇基之永固仰懷昭應欲報無階爰因南至之辰親
展園丘之禮茲惟大慶必及下民乃弘渙汗之私以錫

疲羸之幸所冀漸臻蘇息亟致和平噫朕自臨御以來
歲時尚爾氛昏未殄討伐猶頻甲兵須議於餽糧飛輓
頻勞於編戶事非獲已慮若納隍宜所在長吏倍切撫
綏明加勉諭每官中抽差徭役禁猾吏廣歛貪求免至
流散靡依凋弊不濟宜令河南府開封府及諸道觀察
使切加鈐轄刺史縣令不得因緣賦歛分外擾人凡關
庶獄每尚輕刑只候纔罷用軍必當便議優給德音節
文內有未該者宜令所司類例條件聞奏

四年五月甲辰詔曰竒邪亂正假偽奪真既刑典之不
容宜犯違而勿赦應東西兩京及諸道州府制造假犀
玉真珠腰帶壁珥并諸色售用等一切禁斷不得輒更
造作如公私人家先已有者所在送納長吏對面毀棄
如行勅後有人故違必當極法仍委所在州府差人檢
察收捕明行處斷

是時兩京豪族至于賤隸必假犀玉之詐雖有嚴令亦不能禁止

六月己未朔詔軍鎮勿起土功

九月戊寅頒奪馬令先是王師擊賊獲馬皆令上獻至

是乃止之蓋欲邀其奮擊之効也

五年正月庚寅制曰扈氏不恭固難去戰鬼方未服尚
或勞師其蟻聚餘妖狐鳴醜類棄天常而拒命據地險
以偷生言事討除將期戡定問罪止誅於元惡挺災可
憫於遺黎每念傷痍良深愧歎應天兵所至之地宜令
將帥節級嚴戒軍伍不得焚燒廬舍開發丘壠毀廢農
桑驅掠士女使其背叛之俗知予弔伐之心又制曰戎
機方切國用未殷養兵須藉於賦租輓粟尚煩于力役

所在長吏不得因緣徵發自務貪求苟有故違必行重典立法垂制詳刑定科傳之無窮守而勿失中書門下所奏新定格式律令已頒下中外各委所在長吏切務遵行盡革煩苛皆除枉濫用副哀矜之旨無違欽恤之言

乾化二年正月宣上元夜任諸寺及坊市各點影燈金吾不用禁夜近年以來以都下聚兵太廣未嘗令坊市點燈故也

冊府元龜卷一百九十一